



Inatsisartuni ilaasortaq Agathe Fontain, Inuit Ataqtigiit

§ 37 naapertorlugu apeqqummut ulloq 13. oktober 2015-imeersumut akissut.

Apeqqutinut nassiunneqartunut qjanaq.

1. Tusilartunut siunnersortip, tusilartut tusilartuunermullu sammisut kisiisa atorfimmini suliassarai?

IPIS-imi tusilartunut siunnersortimik ataatsimik sulisoqarpoq. Tusilartunut siunnersortip suliassat assigiinngitsut innuttaasunut tutsarluttunut imaluunniit tusilartunut tunngasut sularisarpai, assersuutigalugu kommunitut suleqateqarneq, oqaluttaaneq, siunnersuineq, ilisimasat aqutissiuussinerillu, taassuma ataani IPIS-ip aviisianik sularininneq taavalu tusilartut ukiumoortumik naapinnerannut aqqissuussilluni il.il.

Suliassat apeqqutaallutik, assersuutigalugu tusilartut ukiumoortumik naapinneranni IPIS-imi imaluunniit avataani suleqatit allat pisariaqarfiatigut ilanngutsinneqarsinnaapput.

2. Taamaangippat suut allat suliassarai?

Qulaani akissut takuuk.

3. IPIS Sisimiunut nuuppat, atorfik ataasiinnaassava?

Sisimiuni nuna tamakkerlugu innarluutilinnut sullissivissamut IPIS-imi massakkut suliassat taavalu sulisut amerlassusaat ilanngutsinneqassapput.

Tassa imaappoq tusilartunut siunnersorti suli ataasiussaaq.

Nuna tamakkerlugu innarluutilinnut sullissiviup pilersinneqarnerani atorfinitsitsinermi assigisaanillu periusiusimasat allanngortinneqarnaviangillat.

4. Ukiut tamaasa Ussersormik oqaasillit (Tegnsprog) naapittarnissaat Naalakkersuisut pilersaarutigaat?

Nuna tamakkerlugu innarluutilinnut sullissiviup ammarneqarnerata kingorna ukiumoortumik tusilartut naapittarnerat ingerlaannassasoq naatsorsuutigineqarpoq.

5. Tusilartut ussersornikkut attaveqaatillit ukiumoortumik naapittarnermikkut, ussersornerup, tusilartuunerullu iluani pissutsit ineriartornerup kingunerisaanik allannguutit, pikkorissarnikkut pisarpaat?

Tusilartut ukiumoortumik naapittarnerat qulequttanut agguarneqarajuppoq, tassani qulequtaq toqqarneqarsimasoq annerusumik sammineqartarluni. IPIS-ip tusilartut pisariaqartitaannik nalilersuinerat malillugu qulequttat toqqarneqartarput, tassani aallaavigineqartarlutik tusilartut ulluinnarni inuunertik qanoq pitsaanerusumik atornissaannut siunnersuinerit aqutissiuussinerillu.

16-11-2015
Sags nr.2015 - 15040
Dok. nr. 1530456

Postboks 260
3900 Nuuk
Tlf. (+299) 34 50 00
Fax (+299) 34 66 66
E-mail: inin@nanoq.gl
www.naalakkersuisut.gl

Innuttaasunut tutsarluttunut tusilartunullu atortorissaarutiniq nutaanik taakkualu atornissaannut ilitsersuinerit neqeroornissaq kommunit suliassaraat.

6. Tusilartut naapeqatigiinnerisa saniatigut, ilaqutaasut ukiut tamaasa pikkorissarneqartarnissaat Naalackersuisut pilersaarutigaat?

Innarluutilinnut suliassaqrarfiup iluani attuumassuteqartunik sammineqartunillu pikkorissaanissamut neqeroornissaq IPIS-ip ilaatigut suliassarivaa. Sinaakkutit iluini pisinnaasut, pikkorissaanerit piumaneqartut neqeroortiginiarneqartuaannarput.

Ussersuutiniq pikkorissaanerit pisariaqartitsineq malillugu, taavalu IPIS-ip nunap immikkoortuini aalajangersimasuni pingaarnersiulluni neqeroortutiniq nalilersuineri malillugu ingerlanneqartarput.

2014-imi Tasiilami Qaanaamilu IPIS tusilartut ilaqutaannut ussersuutiniq pikkorissaavoq.

Oktober 2015-imi Ilulissani Upernaviup pigisaani tusilartunut ilaqutaasunut assingusumik pikkorissaanissaq siunertaanikuugaluarpoq. Tamanna silarlunnara peqqutaalluni 2016-imi upernaamut kinguartinneqarpoq.

Kalaallit Nunaanni tusilartunut sinneruttunut, ilaatigut attaveqatigiinnerup ineriartortinnissaa pillugu, tusilartunut ilaqutaasut ussersuutiniq pikkorissaanissat ingerlanneqarnissaat suli siunertaavoq.

7. Nutserisumik atorfeqartitsinissaq siunertaava?

Nuna tamakkerlugu innarluutilinnut sullissiviup pilersinneqarnerani, suliassat sulisunik piukkunnartunik suliarineqartarnerat ingerlaannassasoq annertuumik pingaartinneqarpoq.

Innuttaasut innarluutilit, taassuma ataani tutsarluttut tusilartullu sulisunik attaveqatigisinnaasaminik sullinneqartarnissaat pingaaruteqarpoq.

Aammattaaq sulisut suliassatik aporfissaqararnatik, soorlu assersuutigalugu oqaatsit peqqutigalugit, suli suliarsinnaassagaat annertuumik eqqumaffigineqarpoq.

Inussiarnersumik inuulluaqqusillunga

Martha Lund Olsen